

梅花溪詩草






梅花溪詩草卷之三

勾吳 錢泳 立羣

永平磚歌爲謝蘊山方伯

啓昆賦

謝公好古今無比嘗補魏書輕伯起千年  
穢史重正之直並龍門司馬氏公餘退食  
憩花前園丁種花鋤得磚依稀辨出永平  
字蒼潤剝落生苔錢初疑漢魏陶工製幾





片元雲質理細厥文非篆亦非隸波畫微  
存晉人勢我聞惠帝屢改元金墉城上秋  
草繁却怪題年尚有此不知昔作誰家垣  
忽憶公居玉堂日八磚移影花生筆今來  
屏翰浙東西吟詩欲壯湖山色豈知瓦礫  
經品題遂與珠玉同珍奇紫薇堂前幾回  
看唱和滿壁瓊琚詞吁嗟乎古來器物晨

星少太康太始皆足寶

乾隆五十年吳郡大旱居  
民於太湖中掘得晉太康

太始  
諸磚

倘公再補西晉書應寫此磚入年表

履園叢話 嘉慶丁巳歲南康謝蘊山先生為浙江布  
政使闢東園地得永平磚八枚先生大喜定為晉惠帝  
時物遂築八磚書舫于其上并賦詩紀之一時和者至  
百餘家或以為明永平廠所造非晉磚也先生怒曰爾  
輩嗜古家每以穿鑿附會為  
長區區瓦礫何足深究耶

憶吳興詩 并序

泳之先自六世祖宋駙馬都尉諱景

蘇隨高宗南渡卜居台州至十一世  
祖承奉郎諱迪又避亂遷吳興理宗  
寶慶元年又遷錫山至泳已十九世  
矣年來往返吳越獨未一至湖州以  
爲恨事作憶吳興詩

茗雲雙溪漾白蘋先公會此避囂塵百年  
子姓多寥落說起吳興一愴神

臨安宮闕但秋烟物換星移總是天聞說  
鷗波亭下路空餘芳草綠年年

細雨

細雨輕于霧霏霏出郭斜王孫不歸去芳  
草滿天涯只比風前淚真爲眼上花登樓  
幾回望惆悵一思家

丁巳九月廿七日舟次吳江天將下



雨

秋氣慘澹秋雲飛野塘橋斷行人稀榜人  
 刺篙當搖槳蘆花瑟瑟風吹衣一雙白雁  
 自相語幾疊青山誰作主故園搖落天西  
 頭穫稻年年揔風雨白酒已熟紫蟹肥亟  
 亟理棹吾當歸

戊午二月十日將赴京師同陳曼生

鴻壽

許春山

鏞

汎舟湖上留別率成

長句

欲望長安正渺茫此心猶注水中央粘天  
 草碧香前路夾岸花紅引別觴金堦考新  
 留話本泳曾作金塗塔考蘇碑榻富壓行裝謂榻蘇文忠表忠觀  
 碑他年若遂煙波願應把西湖認故鄉

京師冬日八詠

國子祭酒法梧門先生課題



鑿冰

鑿冰如鑿井響激昆池冷雙鯉應無眠起  
游唼梅影

採煤

萬夫採寒谷千駝負山隈喜聽鈴鐸語暖  
氣入城來

糊窗

欲障黑風窗先糊白雪紙凍蠅偶飛來  
藜鼓聲喜

燒炕

貼地一團紅溫茶代酒功任他風雪作我  
坐暖雲中

醃菜

滿甕白團團冬來味逾美却笑膏粱人每



日陳八簋

調粥

柔我青精飯調成碧玉甌試施貧士用一飽當添裘

薰花

催花須用火催花不須鼓朶朶透芳鮮春風難作主

夢樹

萬樹帶寒眠齊夢斜陽陌惟有東閣花獨醒對詩客

已未三月望日鄭親王招遊惠園因登雛鳳樓即席賦詩應教二首

曲觀草初綠層樓春正妍凭欄疑入月侍坐恍登仙宴以琉璃盃薰茲玳瑁筵家臣



抱琴至同聽伯牙絃

適有王府長史阿君能琴命彈一曲

東平好為善北海復能書燦燦霞相若翩

翩玉不如春風花作錦秋水月通渠

樓前有  
水一泓

通宮  
門內

自笑梁園客深慙賦子虛

珠湖射鴨圖為阮芸臺少司農賦

三十六湖芹吐芽鴨羣弄羽飛平沙有客

刺船趁輕浪新製權歌不高唱引弓潛聽

唼呷聲欲發猶恐鴛鴦驚欲發不發正惆

悵喜見明珠起湖上君今已到昆明池我

戀菰蒲心若癡使君之弓能借我願入南

山射猛虎

題彭南昌相國所藏馬楚銅柱銘榻

本後

楚王樹國建功多銅柱鐫書繼伏波欲識



五溪平復事誓文墨榻好摩挲

八百年來瘴雨零行人指點一痕青吾家  
鐵券今還守敢勝溪州柱上銘

履園叢話 嘉慶四年春楚南苗民既平有好事者榻得五代時楚王馬殷銅柱銘至京師者銘文為李宏皋所撰此吳任臣十國春秋朱竹垞五代史補注俱未見也南昌相國為裝池巨冊以為至寶泳時寓衍聖公府與陳雲伯同觀雲伯賦七古一首余僅書二絕句云云相國見余詩笑曰此的真錢生詩不可移易他人

嘉慶己未歲移居釣渚感賦二首

昔年遠行遊飄蓬不知返雖有邱壑志人  
事常偃蹇今年來卜居初心遂已晚荒齋  
差堪適俗慮仍難翦所幸母壽康晨昏搃  
平善稚子能誦詩時來問文典有婦織機  
中咿啞自成卷而我紙與筆亦足供消遣  
春樹掩白扉秋花落蒼蘚北牕一夢餘羲  
皇豈云遠



梅在溪言直 卷三  
蟪蛄既有巢鷦鷯亦有枝我生豈無涯擾  
擾將何爲日月已云邁鬚髮空成絲窮達  
固有命富貴知幾時不如歸去來端居賦  
新詩楊墨枉悲泣韓彭亦壑醢致身苦不  
早終爲後人嗤去者已如此來者吾猶疑  
親戚莫相誚旁人那得知

和作

常熟席

亮耕陽

梅溪先生移居釣渚用田郎中雯  
移居詩韻

梅溪才調富五車捆載碑板來移家山  
石犖确卧庭砌紛如長林茂草眠麀麀  
長安公卿重揖客早晚蓮幕開槐衙先  
生善詩兼篆隸落筆千紙風橫斜箕張  
昂萃星異態珊瑚碧樹柯交花倦遊卜



茲數廛宅何異彩鳳隨孤鴉  
悵悵琴操暇一撫朱絃  
疏越不比三弄漁陽搗  
從今竊拊更忘味我雖獨處  
可勿悲嫫媧  
重過蘭韻軒有感

乞食諸姬笑竝肩無端夜半泣  
漣漣一場風雨催花落飄泊  
天涯二十年珠碎花彫事已  
非驚鴻一去信音稀楚王

幽夢年年杳不信人間有宓妃

自潤州城外泛舟重遊焦山看瘞鶴

銘殘石

潤州垂柳正參差指點江天放櫂遲  
沙市非遙宜有酒青山看慣轉無詩  
佛廬再到人將老石刻三摩鬢已絲  
漁子催人渡江去蒼茫故意立多時



嘉慶庚申五月泳偶寓京師宛平令

胡君蕙麓遜招同翁覃溪鴻臚方綱

法梧門侍講式善集古墨齋觀新撫

李北海書雲麾將軍李秀碑刻泳時

將回江南鴻臚侍講各有詩見贈謹

和鴻臚公原韻兼呈侍講師

聞道鴻臚願已諧雲麾李秀碑僅存二礎泳曩在吳門見舊捐本曾雙鈎以贈鴻臚公

公欲重摸上石有年矣來觀新刻喜摩揩偶為北海傳

神筆恰與西涯作匹儕侍講師新修李西涯墓并西涯舊址十載

檀煤尋古碣一肩書劍又天厓多情誰似

長安宰遲我清朝話竹齋

原唱 大興翁方綱覃溪

梧門梅溪同集宛平解觀新刻北

海碑賦此即贈梅溪南歸



壁響濡繒願果諧幾年贖尾蠟煤揩張  
寰馬駿皆安在仙鶴靈芝有舊儕董刻  
若論雙石笈吳淞已翦半江厓不虛而  
月燕都住親到雲麾古墨齋

同和

蒙古法式善 梧門

胡蕙麓大令招同覃溪先生梅溪  
上舍集古墨齋即用覃溪韻奉送

梅溪南歸

北海西涯願總諧看碑看竹眼頻揩前  
緣竟許後賢續冷宦原應澹友儕半榻  
石雲養官閣一船煙墨返江厓寫經樓  
上探奇字折寄梅花蘇米齋

為王惕甫國博

芭孫

畫杏花小幅并

題其上

文杏開紅雪垂楊映碧羅春光鄉國好花  
比上林多

風箏詩

春來見兒童輩游戲百出  
製有風箏八種各繫一詩

老人

何處飛來一百歲翁蒼顏白髮氣如虹扶搖  
直上青雲路多少兒童拜下風

美女

臨風窈窕麗如霞指點雲中是妾家應與  
東君前有約春來散滿世間花

夢蝶

不向花前清晝眠翩然一奮入蒼煙私心  
欲借雙飛翼扶夢依稀同上天

飛魚

未入龍門遂欲飛長天如水頓忘歸祇愁



風雨陰寒夜始識前途去路非

春鴈

乘風嗚咽夜如何似訴衡陽幾度過底是  
春來未歸去他鄉雖好網羅多

秋鷹

東陌西疇風力堅脫鞴鍛羽欲摩天月中  
狡兔何難捉苦被鄰兒一線牽

卿雲

出岫無心絕九寰問卿此去幾時還天邊  
應有羣仙笑一朵閑雲我獨攀

霽月

誰將明月付東風且喜嫦娥別有宮燈節  
乍過春未半一輪光滿正當中

題美人曉妝圖贈苙香校書

柳烟花霧曉窗明若聽金釵墮地聲一髻  
 烏雲隨鏡轉兩痕新月帶愁生當春續夢  
 應憐我和露看花合讓卿千種相思向誰  
 說任他有筆畫難成

履園叢話 荳香校書者本姓蔣氏長洲人能畫工詞  
 曲其父某曾為府司馬父沒後與母獨居遂落藉余嘗  
 有詩云鸞飄鳳泊尋常事一墮迷樓更可憐又云見卿  
 惟念南無佛安得開籠放雪衣蓋惜之也後為鴉母凌  
 虐憂鬱成疾  
 不知其所終

消暑雜詠和袁簡齋先生

辭客

揮手謝塵緣閑居已二年門留君實僕坐  
 有伯牙絃獨樂看園樹移情聽暮蟬為言  
 諸熱客我倦欲高眠

種竹

先人棲隱處常養碧琅玕  
余舊居曰養竹山房先子所築 移得



三竿種能生六月寒  
搖窗供坐嘯  
啓閣問平安  
欲待龍孫發明  
春雨後看

曝書

十載常爲客  
經笥生蠹魚  
掃除三徑草  
曝我滿牀書  
有子癡難授  
無成鬢欲疎  
偶翻舊塗抹  
撫按一長噓

把釣

結廬臨釣渚  
正合讀魚經  
坐久風生腋  
詩成月滿汀  
煙波堪放浪  
身世揔浮萍  
欸乃誰家唱  
持竿試靜聽

滌硯

舊獲端溪石  
研礪春復冬  
朝朝沈綠水  
宛宛見黃龍  
雨過雲痕潤  
書餘墨瀋濃  
呼兒勤拂拭  
辛苦效三農

待月

今夜星河密娥輪尚未來臨軒如待客滅  
燭暫停杯香篆因風裊桐陰上閣開喜將  
琴一弄清漏漫相催

避蚊

豹腳滿天地營營肆裂膚幾人享清福一  
卧夢紗幮移榻知難避登樓計亦愚秋風

聞即至爾輩欲何趨

採蓮

一櫂水風香蓮塘正夕陽飄飄乘逸興采  
采試新涼花巨連雙葢子多盈一房昔年  
爲客處湖上最難忘

對鏡口占

一輪如月淨無塵幾度來看認不真莫怪



鏡中人笑我祇因我笑鏡中人

春遊詩

載酒

載得蘭陵琥珀紅  
數聲款乃漾春風  
開尊莫便陶然醉  
尚要登山學謝公

攜琴

半張蕉葉寫吾心  
十載相隨意自深  
分付

奚童勤拂拭一彈豈爲覓知音

看雲

登山拾級獨徘徊  
且喜遙天霽色開  
直道無人能駐腳  
偏從險絕看雲來

策杖

濟勝難邀赤腳仙  
年來筋力不如前  
扶持自有琅玕竹  
何必從人急急先

野花

誰家紅豔怯春寒  
荆棘相參花半殘  
不種上林應有意  
羞爲騎馬貴人看

邨店

青旗拂拂柳枝斜  
知是深山處士家  
有酒不妨容我坐  
隔籬正放碧桃花

山色

碧嶂丹崖綠樹齊  
遙看不覺暮雲低  
絕勝一幅王摩詰  
我欲書空作署題

泉聲

深林何處響琮瑤  
聽此真堪了一生  
祇恐澗谿留不住  
出山終作大江聲

瓶梅詩和吳杜邨中翰

紹浣

二月尋春天尚寒  
一枝聊供坐中看  
何須



策蹇探消息却把幽香沁肺肝再到法曹  
人已老回思東閣路加難癡情只喜銜前  
影畫肚吟詩到夜闌

廣陵寓中贈家小謝

廷焯

江上相逢便訂盟楊花如雪逐船行偶然  
化作浮萍聚那記前身一樹生

舟泊北固山下見有順風張帆以覆

舟者感而有作

事到傾危休問天世間最穩逆風船甘心  
落後原非計畢竟爭先總自愆上岸可牽  
容我住渡河入曲有人傳平生飄泊同舟  
楫幸不張帆樂靜便

任邱道中夜宿不寐

窸窣牀頭鼠有聲孤燈明滅若爲情身多



疾病羈千里腹短營謀誤一生搔首誰憐  
須鬢改捫心猶喜夢魂清披衣欲起還惆  
悵側聽荒城又報更

乙丑四月十日過質郡王府時王薨  
逝已三月矣

主人弱冠建屏藩忍聽雲車下九原西第  
荒涼生綠草桂宮迢遞少紅旛舉頭忽類

思天鶴揮淚真如哭月猿我是淮南舊賓  
客神仙黃白總難言

京師遇陳晴巖學博

傳經

別後却寄

士有不得志飄然作遠遊相逢各一笑世  
事良悠悠君滯青雲路我歸紅蓼洲分飛  
南北鴈總爲稻梁謀

讀晴巖詩復題其後



去國三千里思家十二時琴彈多別鶴  
泪滴有新詩著作非初願耽吟亦太癡  
黃金臺在望早祝聖明知

聞李曉園河帥出戍新疆詩以志慨  
出獄含冤氣不申啓行時節正殘春  
絕無一僕知前路惟有雙丸若故人  
古堞飛花連紫塞戍樓晴雪映蒼旻  
行行落盡孤臣

淚傾聽

君恩出絳宸

壽汪筠莊明府

煥八十

十年作宰滯延津寶劍升沈不足論  
留得一囊詩卷在歸來猶自課兒孫  
爲佛爲仙樂未央種松種橘亦尋常  
願公延壽溪頭坐釀得年年春酒香

閑居即事

梅村溪詩草 卷三  
乍過廉纖雨頻來舶舫風炎蒸應自減涼  
爽與人同庭草鉏還碧池蓮落更紅一尊  
詩一首忙煞主人翁

過丹陽

古岸秋風木葉稀雲陽驛外暮潮歸一身  
又作離羣雁只向青雲高處飛

晚渡揚子江欲遊金山不果

玉帶橋邊踏浪行幾回欲泊暮雲平癡心  
願比閒鷗鷺獨立江天過一生

擬古

種柏難成陰不如種修竹柏長人已衰竹  
長當春綠却笑凌霄花託身上喬木依附  
過此生自謂能知足一朝喬木枯匠者將  
斤斲空負虬龍形根枝日危蹙何如竹柏



懷森森勁寒谷

其二

灌花正微雨觸熱來清風我生尚無爲所  
遭與之同不視靡曼色不聽清廟鐘恬澹  
愛朝露偃仰看喬松豈如東家子好惡撐  
心胸慷慨不苟合拔刀便相從終當慎出  
處人情九疑峯

其三

福生既有基禍至亦有胎試看古今人禍  
福皆自媒酈生寡言語李陵早歸來子雲  
少識字季倫散多財何至俱喪亡思之良  
可哀如彼塞翁馬得失終難猜

其四

新婦夜亾肉姑怒逐婦去詎知鄰家犬偷

啗無人處婦既受驅迫抑鬱誰能訴崎嶇  
歷險艱哭聲感行路旁人亦有言姑意終  
不悟君子誠可欺小人亦何懼有曲自當  
直披心見情素

其五

庭前有空桑螻蟻噬膏脂膏脂日以盡根  
本隨傾歆當其全盛時車蓋牆東垂美人

攀綠葉黃鳥巢柔枝何期漸衰萎生死難  
自持爲我語螻蟻慎勿肆爾爲一旦伐作  
薪爾等將何之

其六

我昔嘗學道東見滄海君海中三神山樓  
閣何紛紛仙人列如麻甲乙咸能文同行  
六七年起居頗辛勤上堂聽講誦令人聞



不聞所嗟戀鄉切不忍忘丘墳目斷北來  
雁身附西飛雲冰霜我能履涇渭吾能分  
自顧燕雀姿終非鸞鶴羣

題若冰夫人遺照為盛芳亭

朝瑛

作

玉樓人已遠別鶴調空彈聊寫生前影留  
將死後看琴尊千里夢風雪一燈寒落盡  
黃門淚潸潸總未乾

息園小集和家槃溪賞梅詩韻兼呈

范芝巖太史

來宗

及郭匏雅潘榕皋

諸先生

春風乍到野人家老幹疎枝盡著葩濁酒  
敢邀雲外客新詩同賞雪中花一堂話舊  
情何厚十載相思鬢欲華漫說人生難出  
世不妨擲米作丹砂

同和

吳縣 范來宗 芝巖

春分後二日同匏雅榕皋集息園  
賞梅次槃溪韻兼贈梅溪

三賓二主成佳會  
疎影橫斜欲吐葩  
舊是勞人新逸客  
醒來熱夢醉寒花  
毫端

羲獻消時日

梅溪出所臨 晉唐人諸帖

爪蹟齊梁閱歲華

息園為蕭 梁遺蹟

壽世長生知有訣  
不須句漏乞

丹砂

又

吳縣 郭毓圻 匏雅

巾屨追歡穆父家  
春風索笑逗寒葩  
主人有酒能求友  
授簡無題且看花  
耆舊兩三容  
嘯傲名園水木自清華  
妙嚴墓下尋苔徑  
曾對疎枝映淺砂

又

吳縣 潘奕雋 榕皋



名園隔巷春初到老榦閒庭梅放葩揮

劍筆鋒誇腕力梅溪出示所臨小楷卷軸甚富掣鯨詩句鬪

心花槃溪詩先成索同人和之待圖雅集留文苑槃溪欲擬西園

雅集作圖偶話前塵感歲華與芝巖談及往年在京師諸事會得

逍遙箇中味底須伏火問丹砂原唱有句漏砂句故

云

戊辰四月初八日同陳九巖鴻達士

巖鴻磐昆仲遊吼山作

昔我來會稽茲山未經至今汎鏡湖舟惝

恍如隔世櫂舟入口山忽暝恍墮仙家轆

轡井仰視絕壁天蒼涼下有蛟龍食人影

雲根萬古鑿不穿留此殘石為人看一聲

長嘯月初吐欲去不去心茫然

九月廿九日琅邪道中雨阻待孫淵

如觀察星衍不至

風雨三宵絕道途今朝試問可行無濕雲  
已洗連峯碧殘滴猶懸滿樹珠月晦終當  
開寶鏡天遙且喜見香爐已見東蒙諸山故人有約  
來何暮繫馬留連未忍驅

夕次淮陰與胡生左君源夜飲

落日西風野色昏長途辛苦且休論誰將

黃水通江滸不使清淮出海門囊罄尚堪  
供我醉境窮最怕受人恩王孫落魄緣何  
事欲問韓侯萬古魂

男曰奇 曰祥 益生謹校字



梅花溪詩草卷之三

梅花溪詩草卷之四

勾吳 錢泳 立羣

嘉慶己巳七月偶遊京師小住近光

樓者二十日時泳將回江南敬賦長

句呈英煦齋和趙謙士秉冲兩少司

農兼留別席子遠煜姚伯昂元之兩

編修

樓前車馬響如雷人在青山紫禁隈百頃  
池臺因地起千年雲木傍天開久欽二妙  
同民部恰見雙星列上台

時子遠伯昂兩  
君新入南書房

笑我

身閑無一事獨隨野鶴步蒼苔

其二

蓬萊十日小勾留喜與羣仙會一樓太液  
蓮花猶自發薊門山色最宜秋仲宣不免

思鄉淚鄭衆偏多爲國憂別館笙歌聽未  
歇雞人傳唱月如鉤

其三

一番秋雨一番涼立馬重門夜未央玉露  
珠懸雙闕曉宮槐花落四蹄香明朝彩  
仗應無事昨夕銀河倍有光我亦相思千  
里道欲憑行止費商量



其四

從今歸去聽秋聲  
恰與飛鴻結伴行  
雲水偶然留雪爪  
江天何處覓鷗盟  
回思舊事千腸結  
乍覺新涼百感生  
却羨昆明池上柳  
世間離別不關情

和作

已巳七月與梅溪先生同寓近光

桐城

姚元之

伯昂

樓作此奉和兼以志別

襟華溪上一書生  
文字風流老性情  
身外有緣多美譽  
世間難副是才名  
豪心早已逃千劫  
貧士偏能擁百城  
我欲整冠牀下拜  
幾回風雨話生平

其二

阮家叔姪古無儔

今姪樹堂同在京師

何幸相逢此



地遊青史無傳同一瞬布衣有福足千

秋歌驚野鶴常窺案隔園有鶴甚馴筆引奇

雲欲下樓剩得江南好清夢不教心事

寄更籌

其三

東西車馬歷多春蓬轉能甘自有真懷

裒詩才唐處士講明隸法漢功臣漢隸自唐以後

遂成絕學

國初鄭谷口始興之

一樓紙筆當清

然流為別體惟先生講明最正

供先生曾寫十三經文字俱仿蔡中郎

半世風塵

為古人竊喜從君參末議三千年後豁

迷津

其四

西風浙瀝起秋園連夕憑闌笑語喧談

到歸心愁月子句慙題碣感雲孫錢文穆王有神



道碑一座在今錢塘縣龍山先生恐其傾圮買石護之遂作護碑圖屬元題句他年共有溪

山約此日先留雪爪痕我自趨公君自

去清平閒敘總天恩

登泰山作和友人韻

特立三峯壯崔巍五嶽尊風雲生指顧日

月盪朝昏席地疑無路通天別有門回頭

衆山小羅列盡兒孫

表蘭邨參軍通索題莫愁湖秋汎圖

遂書二絕句於後

十年前過莫愁湖煙水空濛乍有無想到

水西門外路雪泥鴻爪已模糊

百首新詞韻最嬌畫圖重見欲魂消何時

得共袁臨汝一棹秋風話六朝

詠錢六流書四字對聯莫不六流



去來罵汝太荒唐四字模糊算孔方藏弄  
何常充我用經營總為別人忙甘心趨富  
無須說故意欺貧亦不妨我有青山田十  
畝儘能買醉舊江鄉

嘉慶癸酉春三月移居翁家莊偶成

四首

我生鹿鹿竟何為買得田廬鬢已絲事到

緣來如有約心從喜極轉成悲無須狡兔  
營三窟却學鷓鴣借一枝滿載琴書兼菽  
粟春風雙漿去遲遲

其二

桃源緱嶺不須論指點青山第幾邨一曲  
清溪花引路數間板屋犬迎門似真似夢  
思今昔為構為堂聽子孫擬種梅花三百



樹還將叢桂補雲根

其三

垂柳爲門薜作牆  
開林先埽讀書堂  
羊裘乍脫風初暖  
蠶事方興日漸長  
近市所宜沽酒便  
有園翻厭灌花忙  
閉關那管旁人笑  
一卷南華醉一觴

其四

少時作客走幽燕  
水陸風霜二十年  
往事祇堪搖素手  
新詩聊復聳吟肩  
坐無筆硯身難著  
家有琴尊我欲仙  
且喜向平心願畢  
從今不負日高眠

和作

大興翁方綱  
覃溪

梅溪叅軍卜居海虞翁家莊奉寄

二首



錫山卜築到虞山紅豆春濃拂水灣三  
載遙懷來問訊半生靜閱得蕭閑畫從  
烏目中箱補書倍遵王著錄刪新起錢  
家金石例更深汲古許誰攀

吾家司寇舊山莊手澤璇洲記草堂四

世孫曾交有諾

常熟翁氏與予家順天派同出莆田一桂房鐵庵公孫及曾孫音問

久廿年書問夢難忘因君託訪鄉園近

似我追陪几硯旁重結梅花盦主榻更  
添金薤富琳琅

又

吳縣潘奕雋 榕皋

奉賀梅溪二兄移居詩卽用元韻  
滿船載得畫詩書聞說翁莊已定居最  
愛晴嵐當畫戶更移香雪護雲廬眼明  
身健神無累飯軟茶甘樂有餘況復兒



孫能濟美傳家經訓足蓄畬

我亦幽居近廿年息機常日枕雲眠乞  
碑道士曾貽墨問字山僧與品泉老病  
但知閒適好鱗鴻猶幸往來便小春風  
物暄妍甚乘興還移訪戴船

又

長洲

褚鳴翮 觀亭

長憶詩盟盼不來移居近傍尚湖隈插

籬好種淵明菊繞屋先栽和靖梅鮭菜  
過街臨小市山泉入浦淨浮埃問君何  
物充家具萬卷圖書滿載回

和韻

長洲

尤興詩 春樊

梅溪索和移居詩卽次其韻

高尚奚所爲滄江垂釣絲饒有晉人致  
不作楚客悲竭來謀新居繞屋多高枝

自昔文學盛學道寧嫌遲

其二

世事不復論水竹環一村有書可乞米  
無人常掩門于以樂琴書于以長子孫  
柯條自茲茂先培方寸根

其三

怪石撐短牆空翠飛虛堂種梅清溪上

料已如人長時對新獲帖日爲古人忙  
墨朱有餘閒陶然攜一觴

其四

發軔歷幽燕聲華垂廿年歸來託嘉蔭  
常聳吟詩肩自耽谷口隱兼作羅浮仙  
窗日碎紅影先生猶晏眠

履園叢話 余以癸酉年春卜居翁家莊相傳爲翁司寇叔元舊宅也嘗作七律四首自寫曾臆一時和者至



數十家字字珠璣不能盡錄周昺齋太守押門字韻云  
虞山拱笏青延屋春水如油綠到門袁茂才治押仙字  
云不求聞達寧非福得聚妻孥便是仙席上舍世楠押  
肩字云莫將清福看如水好去紅塵息此肩陳上舍柘  
慈炆云載酒定多人問字司花應遣鶴看門又云已逢  
叔度思投轄乍見洪厓笑拍肩皆名句也惟第一首悲  
字最難押如王艾軒之得完太璞非容易一瑣名疆便  
可悲袁茂才之丘壑從心容我懶煙花過眼替人悲俱  
妙陳柘慈為伯恭學士之長君其夫人王氏名崑藻號  
綺思華亭人所和四首尤為絕妙附錄于此其一云軟  
紅撲面復何為收拾歸心上釣絲已卜鶯遷酬燕喜何  
勞鶴怨與猿悲高情陶令營三徑妙喻莊生戀一枝看  
盡稻花香十里耦耕生計未嫌遲其二云振衣千仞恥  
徒論占得臨溪郭外村豈為逃名辭越水偶因長嘯寄

蘇門緩歌漫弔前朝蹟風雅能歸異代孫定有新詩吟  
白紵清樽檀板付桃根其三云小住吳中隔一牆僦居  
何幸近華堂花開綺陌青春短燕蹴晶簾白日長落紙  
乍驚詩筆健當歌不厭酒杯忙請看袞袞登臺者可有  
閒情把玉觴其四云才名夙昔動幽燕瞥眼星霜歷廿  
年筆陣鍾王無敵手譚鋒荀陸本齊肩早趨朱邸稱詞  
客晚臥滄江作散仙最是撐  
腸五千卷一甌茶熟正高眠

癸酉初冬舟發吳興探峴山道場歸

雲諸勝

昔欲來吳興人事牽籬樊今日遂初志扁



舟負朝暄遙瞻峴山隈木落秋草蕃窪樽  
與浮碧碑倒亭空存道場已在望舍舟扣  
僧門攀緣入雲封石塔撐天閣孤峰自回  
抱諸山若兒孫老佛對我坐四顧皆頽垣  
苦竹出階屺刺棘當前軒仙人孫太初歸  
雲有荒原不見芳酒酹時聽松濤翻仙佛  
苟如此人生何足言

次日遊白雀寺

買舟碧浪湖策杖白雀寺羣松吼蛟龍野  
竹搖蒼翠行行上山顛一一紀靈異坡公  
有遺蹟已被僧所棄青蓮或重開人情總  
難計惟有具區雲差得象外意

謁趙季由太守

學轍

訪墨妙亭已無

存者共坐六客堂命酒小酌盡醉而



返二首

苔花正浮雪橘林新著霜謝公到郡久今  
始來斯堂握手招殘碑一笑傾壺觴墨妙  
已無亭寒花尚餘香義獻不可作顏徐亦  
難量俯仰感古今緬焉暗神傷

坡公來吳興嘗晤孫莘老酬贈詩最多當  
時和者少屈指七百年此事誰復討青山

依然古刻蹟如掃乃悟金石質年壽猶  
不保何如飲美酒令我顏色好

履園叢話 宋孫莘老嘗知湖州彙集漢唐諸賢名蹟  
石刻于郡齋壁間署曰墨妙亭東坡爲作記並賦詩刻  
石中有云吳興太守真好古購買斷缺揮縑繪龜跌入  
座螭隱壁空齋畫靜聞登登蓋紀實也吳興志云元人  
守湖州粗砂大石皆磨去是以漢唐諸刻無有存者惟  
存東坡詩一石而已後此石亦斷缺不全其一片嘉靖  
中王陽明守仁謫龍場驛丞時得之曾琢爲硯存十二  
字見裘文達公曰修記一時朝貴俱有詩蔣心餘七古  
一首尤爲絕妙其一片天啓初黃石齋道周得之亦琢  
爲現存十七字爲吳興姚玉裁所藏後歸桐鄉汪氏當



時如厲樊榭丁龍泓蔣心餘諸公亦各有詩以紀其事  
載吾友張芑堂徵君金石契中余幼時猶見榻本今戲  
鴻堂帖所刻全篇是思翁取  
舊刻重摹非真蹟入石也

題師禹門司馬 亮采 蕭城練勇圖

霜落山城鼓角喧指揮精卒尚桓桓修文  
用武原無二馳驟縱橫一律看

白蓮花發影重重探得妖氛自折衝一夕  
西風消滅盡好拋金甲事春農

秋林漁唱圖為馮柳東文學 登府作  
時在秦郵官舍

白鷗點點青螺遠扁舟欲泊林塘晚數聲  
款乃月初規應唱新填絕妙詞我亦有家  
尚湖曲秋風歸去空相思

師禹門司馬以聽楓圖見示輒題其

上



平生遊歷處一一紀丹青感舊情無極思  
親涕欲零長風何日靜大樹幾曾寧我亦  
同君恨年來未忍聽

載月尋詩圖

江城葉落自紛紛載得空明欲入雲一曲  
新詩秋正好筆端呼出謝將軍

甲戌秋日過西莊橋舊宅有感書呈

大兄四姊兼示諸姪

浦巷東頭舊草堂小橋流水接西莊圖添

新竹詩千首

舊居有養竹山房先子所築也嘗畫  
一圖近求名公鉅卿題詩卷帙皆滿

人

似枯槐夢一場親故彫零誰可問兒童嬉  
戲總難忘白頭幸有吾兄在說起雙親泪  
兩行

其二

姊在青山路正遐年垂七十尚浮家良人  
早沒貧多累有弟相扶鬢亦華煮粥自能  
呼僕妾聽書猶憶隔窗紗近來聚首頗強  
健手刺新花爛若霞

其三

竹林別室幾經秋元鳳能詩志未酬幸脫  
素衣傳筆硯急陳清酒告松楸

時大姪有  
穀遊庠焚

囊有意終須記畫虎無成亦自休墳墓遠  
違歸未得應憐癡叔守荒邛

其四

庭前紅豆樹無存滿逕蒼苔別有門欲賣  
田園心未忍因思骨肉淚頻吞

三姊適鄒氏  
去世已卅年雲

山密爾成千里水竹依然自一村羣從紛  
紛留我住開窓且喜酒盈罇



甲戌除夕偶閱舊稿口占一首

人閒萬事正崢嶸我對椒槃亦自驚去故  
惟刪詩百首迎年且進酒三觥杜陵景況  
何堪說賈島精神總不平爛醉燈前成一  
笑梅花晴雪映窓明

閒居二首

昨夜聞酒香今日欲開甕偶然書八分或

取琴三弄擡頭月正圓一樽與妻共  
中歲頗好靜朝朝卧前楹下帷悄無言真  
如守堅城諸孫喧然來竹馬騎縱橫

卽事

自到翁莊買薄田灌園種秫過年年閒情  
欲比陶彭澤強記難如李敬元喜作新詩  
憶耆舊笑將往事等雲烟紫薑青笋黃花



酒一醉東窓百慮捐

○  
余内子素不能詩而言語閒時有詩  
意看海棠花云笑他不解人將老初  
夏步園中云滿園新綠勝于花皆可  
誦也戲為續之

一樹紅雲拂面來堂前那厭看千回笑他  
不解人將老偏約東風對我開

女桑葉暗筍抽芽姹紫嫣紅一道斜莫怨  
春花容易謝滿園新綠勝于花

和韻

華亭 女史 王崑藻 綺思

奉和梅溪先生原韻

番風催得好春來燒燭重看更幾回一  
笑幻將花色好賺他妙句自天開  
幾度春風茁嫩芽小庭亦有一枝斜批



紅判白年年嬾輸與君家解語花

又

昭文歸懋儀佩珊

好句何人續得來累他夫婿費低回遙  
知趙管聯吟處歲歲花前笑口開

藍田雙種玉生芽品翠評紅點筆斜蔗  
境風光無限好繡帷同夢筆生花

嘉慶乙亥春日借寓吳門之舊學前

戲作五絕句題曰索潤筆詩傳示同  
人以為一笑

買山無計已堪嗤況值年荒穀貴時只學  
魯公來乞米故將心事告人知

其二

香餅清泉問有無何勞載酒更提壺五乖  
五合須相諒莫說恣恣易點污

集事淵海曰有人遺歐陽公香

丸

餅清泉為潤筆者  
蔡君謨聞而笑之

其三

搦管年年蘸墨雲  
刻碑總角有來因  
世人

比我黃仙鶴那管  
元和樣脚新  
戴安道總角刻  
碑事見晉書本

傳並法書要錄予十餘  
歲時亦能書刻碑版

其四

東塗西抹為誰忙  
終日懵懵筆墨鄉  
我不

負人寧負我  
卻將筆墨要人償

其五

眼前富貴總雲煙  
身後聲名劇可憐  
種得

端州田自足  
何須造孽使人錢  
唐六如詩云閑  
來寫幅丹青賣

不使人閒  
造孽錢

投械歸農詩為陳  
雨峯參戎  
階平  
作

投獻干戈願改良  
草間崩角類羣羊  
天公



似爲蒼生福故使將軍靖一方  
不煩弓甲不論兵化得頑民買犢耕指點  
胸山山下路他年應築受降城

嘉慶丙子閏六月初五日有流求國  
巡見官毛朝玉自八重山失風漂蕩  
五千餘里至海州之鷹遊島刺史韓  
城師禹門先生以柔遠之禮慰至城

中朝玉方袍大袖冠黃冠著草履所  
攜童子一人馬二匹竝從者二十餘  
人皆無恙時余與王仲瞿孝廉曇俱  
在州廨親見其事因問其國中官制  
及君臣之禮者久之顧朝玉不通華  
語相與筆談竟日作聯句詩以贐其  
歸國云

無端相失八重山 梅溪 喜見蒼顏九品官

入夜魚龍驚赤土 仲瞿 滿船風雨冷黃冠

狂流幸免歸崇敬 梅溪 神火能危管幼安

賴是天朝三十六 仲瞿 操舟人在且盤桓

梅溪

其二

髑髏疑悞未曾諳 彼國無髑髏臺梅溪 孔望山

事是古史傳訛

前欲問郊歸國有期留小駟 仲瞿 破帆無恙

載童男謝公詠月參詩注 中國之海蜃名水母者毛朝玉云倣國俗

名海月此謝靈運所謂挂席拾海月者始得真解 梅溪 沈括工書著筆談

朝玉工書法 落際漂流成故事 仲瞿 送君安穩到

東南 梅溪

雲臺紀遊詩

嘉慶丙子七月初九日將遊雲臺山



別師禹門太守自甲子河放舟宿南

城

世俗怪迫隘輕舉事遠遊久聞郁州山靈  
境殊清幽太守爲治行漁人擢扁舟朝發  
秦東門夜宿南城頭山月正迎我相對開  
吟眸呼童檢行篋命酒浮香甌一醉秋燈  
滅和衣暫時休

次日早起乘肩輿行二十餘里至大  
邨

平生寡所營見山卽心喜肩輿坐我行  
于廿餘里秋花貼地紅朝霞半天紫山澗  
清且淺吾慮澹如此前峯日初出後峯雲  
又起兩目不暇接山陰差可擬馬耳何蒼  
然盈盈隔一水

遊鬱林觀

指點獅子巖來尋鬱林觀東海日已高山  
人未朝飯忽聞雷殷殷飛泉落天半恠石  
何艱脆癡雲欲消散剔蘚讀殘碑生平未  
經見我素嗜金石幽隱尤所羨況有洞壑  
奇煙霞日千變何當結茅屋深居遂吾願  
讀東巖上唐人石刻記

側足上崩壑花草開繽紛東巖一拳石深  
刻唐人文隸古廿一行筆力含千軍其文  
亦華贍官爵連書名埋沒空山隈蒼苔字  
中生歐陽未收錄千載無人評是時日將  
夕風雨來縱橫癡心尚留戀愈激秋泉聲  
由海清寺前取道上竹節嶺登南天



浮圖聳層霄廢寺埋荒草盤旋兩峰閒畢  
竟前途好拾級山縈紆攀緣入雲表蕩蕩  
天門開直欲凌蒼昊四顧疑蠶叢獨立數  
飛鳥却笑世上人擾擾何時了不到青山  
來祇向紅塵老

過九龍橋看澗底古松小憩半日  
九澗匯一流上架青石梁鬱鬱澗底松不

知幾千霜忽疑暴雨至喜見濃雲張有鳥  
適飛來一子落古香人生無百年白駒去  
堂堂我懷圯上翁更憶張子房及時不爲  
樂垂老空悲傷

夜坐三元宮東軒同一老僧散步西  
竹園看月有懷陳雨峰參戎

夜坐殊寂寥攬衣出深隴下方尚行人上



方已鐘鼓海氣亮于月松聲冷如雨流螢  
互明滅歸雲亦吞吐前有黃砂石恐是白  
額虎我生愛山水又慕將軍武有勝必先  
登青山敢余侮不避星與霜豈怕天尺五  
將軍應笑我貪遊亦辛苦

登清風頂看東海日出

興發不能寐聞雞再相天四更策杖行五

更登其巔扶桑正銜日大海當我前十洲  
與三島呼吸相通連仰視但蒼涼俯瞰惟  
雲煙到此萬念空兩耳風琅然

出西竹園上下數十級觀所謂臥松  
者悵然有作

巖下有古松蟠蟠甚局促枝橫一千丈腰  
大三十輻元鶴翔其肩白雲翦其腹豈無



梅在溪詩草 卷四  
凌霄志直並參天木何至千萬年甘心臥  
空谷此松掀髯嘯似言已知足人世多良  
材所患常拘束一為匠者顧登時有榮辱  
曲以全吾身蕭然享清福

雲飄從前頂盤曲而下又登後頂望海中

諸島

導師比猿猱遊客若鷹隼有眼看不足有

手寫不盡今從後頂來直與前頂等崖傾  
山欲飛路失雲相引東海何茫茫漲沙十  
萬頃不久為良田別闢桃源境將攜妻子  
來滿山補紅杏

東磊石壁精舍聽張道士雪堂彈琴  
東磊一房山權奇世罕有虎豹自空落蛟  
龍上天走千鬼怒屹立萬鬼齊張口爭占



壁壘中輪困愈形醜中有方子春抱琴自  
相友拂石薦清商爲我一揮手海水盪我  
前禽鳥號我後恍到蓬萊山將移我情否  
下東磊沿海行十餘里探漁灣隔峯  
諸勝宿諸曹村汪涵五茂材家并示  
其弟聖傳樹功兩文學

遊山比棋局一著當爭先迤邐沿海行腳

底生雲煙恐到天盡頭茫然使心寒漁家  
聚如市曬網巖西灣得魚便沽酒老少同  
我閒行抵諸曹村斜陽未沈山野田稻初  
熟屋舍尤儼然主人笑相迎兄弟交躋攀  
邨中一時集疑我是神仙

過五羊湖住宿城山法起寺方丈  
問訊五羊湖來過萬金壩宿城已在望法



王有廬舍山僧六七輩見客似驚訝我亦  
修行人禪牀倘能借花竹成林園牛馬同  
耕稼支公示寂去一任花開謝寺中有長老量遠者初示寂未  
葬留得雲霧茶汲泉煮清夜

出虎口嶺由平山村東北行至孫家

山

僧家住海口潮水通禪扉行客欲投宿主

僧猶未歸徘徊松竹閒花草見所稀萬峰  
如有待一鶴盤空飛時有一鶴望空而飛舉手招不來我

心尚依依風喧起奔浪山缺留斜暉欲看

磨崖石還來釣魚磯山東面沿海有蕭望之釣臺臺上有隋開皇三年王謨題石

渡海至鷹遊山煙火數百戶屹立大

海中真奇境也

十日踏青山秋晴喜無雨興濃精力健山



靈固所許今晨渡海來挂席輕如羽蛟龍  
正安眠水府亦不拒乃知山海閒是處皆  
吾宇散步西連島上有居民聚衣食生魚  
蝦休養多男女笑他白浪堆竟是黃金浦  
望望三神山僊僊欲起舞

二十二日始出山過田橫固白雲四  
塞風雨將至仍宿大村

人世若飄風富貴等朝露惟有青山色令  
人自傾慕竭來已半月惓惓未能去雖無  
埋我心不免煙霞痼纔經孝婦祠又到田  
橫固田橫固地名  
見雲臺山志回頭日色薄雲迷雨將布何  
須著腳忙一笑可生悟大村指顧閒有船  
且無渡轉瞬復晴明只認來時路

西風題許嘯山太守晴郊秋獵圖遺照



西風蕭颯天隕霜馬谷山頭草木黃

嘯山曾出知山

東武定府

太守見獵心所喜一龍突出羣龍翔角

弓乍鳴矢如雨先發應弦中左股豈因得  
鹿入林中還擬深山射猛虎玉驄一去太  
恣恣雁書已斷秋雲空仙蹤試問歸何處  
笑指海山東復東

禹門太守以春雨渡江圖見示戲書

一絕

春風吹得雨瀟瀟春水新添一尺潮何事  
渡南還渡北扣舷我欲問金焦

蔡曼綬上舍

成輅

嘗愛宋人張玉田

詞因自號曰佛田繪圖賦詩爲題其  
後

買絲繡平原鎔金鑄賈島君今心折玉田

生直與古人共傾倒白雲空濛春水長中  
 有孤雁相迴翔譜得新詞真絕妙聲聲傳  
 出蔡中郎上舍著有白雲詞其中春水孤雁二闕最為傳誦  
 小園即事贈內子二首  
 年高成嬾慢心死著寒灰十日閉門坐小  
 園花亂開燕雛成翼去蘿碧挂牆來新得  
 相思子欣然還自栽

雨餘新笋出葉暗蔓藤香落果從人食飛  
 花趁蝶忙行吟堪度日酣臥又斜陽且盡  
 今宵醉夫妻滿一觴

男

曰奇 偉堂 曰祥 益生謹校字



梅花溪詩草卷之四終

